

Ausgemoppt.

Nee, was is dann des? – ich guck an mir nunner und do sin lauter Franse – Franse, ich weeß gar net, was fer Franse – so Bommle, ich mään, des sieht fascht aus wie so Bommle vun em Wischmop. Also un die hänge an mir draan, ich seh sunscht gar nix außer dene Bommle, vun meim Kopp bis an die Fieß tausende vun dene Wischmopbommle, des gibt's doch gar net, ich kumm mer fascht vor wie bei dem Kafka.

Un dann seh ich unsern Badezimmerbodde, genau unner mir, unn wie ich grad denk, was schweb ich dann do en halwe Meter iwwer unserm Badezimmerbodde, do sack ich nunner un mach en Rutscher uf dem Bodde – also, ich quasi de Mopp, unn rutsch un rutsch vun de Dusch bis zum Klo, knall an die Badewann und widder zurick. Ich versuch als mein Kopp zusammenzuziehe un denk, was is des, wer wischt mit mir do uff dem Bodde rum und guck nach Owwe unn dann bin ich wirklich ferddisch mit de Welt – do is kee Dach mehr iwwer meine Badewann unn iwwerhaupt iwwer dem ganze Badezimmer – nur e langi Schnur unn an der häng ich dran, un die Schnur ganz owwe an em riesische Kran – unn der schwenkt jetzt grad widder aus, unn ich knall an die Badewann, genau do dran, wu mein Jingschter sei neies Badespaßöl ausgelehrt hot, was ich geschtern scheints iwwersehe ghabt hab beim Putze – dann guck ich nuf zu dem Kran unn ganz owwe in der Kabine seh ich se: Do sitzt se, an de Schalthewwel vun dem Kran: Mei Fraa – grinst unn rutscht mich zurick zum Klo ... awwer bevor ich jetzt a noch an die Schissel brumm klingelts unn klingelts ... Ich weeß gar net was des jetztert widder is, bis ich mer de Hinnerkopp an dem neie Hängeklo anhau. Un in dem Moment merk ich, was do klingelt, des muss mein Ältschter sei, der grad aus de Schul kummt und rappel mich unner dem Klo vor, wu ich scheinbar vor Erschepfung eigshlofe sei muss. „Friejhohrputz“ sollt ich mache, hot se gemeent die Fraa Direktern, also mei Fraa, die do de ganze Tag in de Firma die Chefin markiert, ich bin jo jetzt uf Elternzeit, ich wollt des jo ach gar net annerscht, hab des awwer irgentwie total unnerschätzt. Seit ich do also in Elternzeit bin, entgleitet mir mei Lewe. Des war noch enner vun de scheenschte Drääm. Awwer was stinkt dann do? – Ach Gott de Oofe, Pizza, jeden Tag die Ploog mit dere Pizza, unn jeden zwette Tag Schwarz-Pizza, heit rauchts schun durch de Flur, `s kummt halt immer was dezwische. Un des Gekreische! – Jesses, die Klee, Windel voll, nee, net jetztert. Muscht Prioridäde setze: Erscht die Pizza, dann an die Deer wegem Filius unn dann die Windel!

Es klingelt, schun widder, diesmol des Telefon: Ich guck uf die Anzeig, mei Fraa, um Gotts Wille, keen Uffschub meeglich, muscht uffnemme: Ob alles in Ordnung is, frogt se. Schnell des Radio ufgedreht, um des ganze Chaos do zu iwwerbrille. „Ajo“, sag ich, „alles in Budder“. Un warum des Radio so laut wär. „Jo, do gibt's widder nur Kataschtrophe – also im Radio, stell ich noch klar – muscht jo doch e bissel uff em Laufende bleiwe unn es war grad so entspannt dehääm, nee Du brauchst der kee Sorge mache. Ob des der Feiermelder wär, der so schrillt, meent se. Nee, der kann des net sei, *denk* ich lieber bloß, den hab ich letscht Woch ausgebaut, nachdem der dauernd Alarm gschlage hot wege denne Kruschte pizzas. „Des Martinshorn? Jaja, des kummt aus`m Radio. Du, ich muss jetztert Schluss mache, die Klee hot gerufe!“ Un genau in dem Moment wie ich uffleg, is zwar noch e Dach uf meim Badezimmer, awwer kee Dier mehr im Hausflur, do sin se nämlich grad neigstürmt, volle Montur, zwee Leschzieg vun de Feierwehr setze mei Erdgschoss unner Wasser. Wie ich des meiner Fraa erklär heit owend, hab ich mer noch gedenkt, awwer do kumme schun zwee Sanitäter, fiehre mich ab un lege mir so e komische Jack um. Was is dann des jetztert, ich kann mich schun widder net mehr riehere, aber diesmol is des keen Draam ..., dann nur noch Schwarz vor de Aache un totaler Filmriss.

Zwee Monate später liech ich wie jeden Tag in dem scheene weiße Zimmer zwische Kisse, es kloppt an die Deer, mei Fraa kummt rei mit e paar Blumme. Wann ich jetzert noch drei Woche so verninftich bin und so ganz normal, strahlt se mich an, dann derft ich sogar widder schaffe gehe – Immobilieberater, wie frieher – 40 Stunde die Woch un noch e paar Iwwerstunne un wochenends ins Muschterhaus: Was en Draam! -, denk ich nur gaaaanz korz, un bin iwwer mich selwer verschrocke. So en Quatsch: ICH kümmer mich um mei Kinner, fer die bin ich do, un dann kummt ganz lang erschmol mol nix, und zwar gar nix. So sieht des aus. Un deshalb gibt's nor eens: Emol probier ich des noch mit dere Elternzeit. Werscht sehe, diesmol klappts!